

BOSNA I HERCEGOVINA
FEDERACIJA BOSNE I HERCEGOVINE
ZENIČKO DOBOJSKI KANTON
OPĆINSKI SUD U TEŠNJU
Broj: 39 0 K 073661 24 K
Dana: 22.09.2025. godine

U IME FEDERACIJE BIH!

Općinski sud u Tešnju, sudija Bekrić Hidajeta, uz sudjelovanje zapisničara Hidajete Mehinović, u krivičnom predmetu optuženog D. M. sina S. iz Č. br. 78, općina Tešanj, zbog krivičnog djela "krađa" iz člana 286. stav 1. u vezi sa članom 31. Krivičnog zakona Federacije Bosne i Hercegovine, povodom optužnice Kantonalnog tužilaštva ZE-DO kantona Zenica broj T04 0 KT 0046835 22 od 24.01.2023. godine, nakon održanog javnog pretresa u prisutnosti tužitelja Kantonalnog tužilaštva ZE-DO kantona Baždalić Rasmie i optuženog, dana 22.09.2025. godine donosi sljedeću:

P R E S U D U

Optuženi D. M., sin S. i majke S., rođene H., rođen ..., godine u S. B., R H., nastanjen na adresi Č. broj 78, općina T., pismen, sa završenom SSS, po zanimanju mehatroničar, razveden, lošeg imovnog stanja, Bošnjak, državljanin BiH, JMB: ..., osuđivan presudom Općinskog suda u Tešnju broj: 39 0 K 057480 19 K od 10.04.2020. godine za krivično djelo posjedovanje i omogućavanje uživanja opojnih droga iz člana 239. stav 3. KZ F BiH na kaznu zatvora u trajanju od 3 (tri) mjeseca, uvjetno 1 (jedna) godina,

K R I V I J E

što je:
u noći 05./06.08.2021. godine, u mjestu Ž., općina U., zajedno sa K. N. oduzeo tuđu pokretninu s ciljem da njenim prisvajanjem pribave sebi protivpravnu imovinsku korist, svjesni da takvim svojim postupanjem oduzimaju tuđu pokretninu i da time mogu nanijeti štetu drugom, što su i htjeli, na način da su došli do objekta pilane „Ćelo Prom“ d.o.o. vlasništvo Č. M., koja pilana se nalazi u industrijskoj zoni iz koje su pilane otuđili električni aparat za varenje ručne izrade plave boje i dvije električne brusilice, nakon čega su se udaljili u nepoznatom pravcu, na koji način su sebi pribavili protivpravnu imovinsku korist u iznosu od 1.000 KM, za koji iznos su vlasniku prčinili materijalnu štetu u iznosu od 1.000,00 KM,

dakle, tuđu pokretninu oduzeo drugom s ciljem da sebi pribavi protupravnu imovinsku korist,

čime je počinio krivično djelo krađe iz člana 286. stav 1. u vezi sa članom 31. Krivičnog zakona Federacije Bosne i Hercegovine, pa se na osnovu istih zakonskih odredaba i odredaba člana 43.i 49. KZ FBiH osuđuje

O S U D U J E

na kaznu zatvora od 1 (jedan) mjesec i 15 (petnaest) dana

Optuženi se obavezuje da oštećenom Č. M. na ime prčinjene štete ovim krivičnim djelom isplati 500,00 KM u roku od 60 dana od dana pravosnažnosti presude.

Optuženi se oslobađa od plaćanja troškova krivičnog postupka.

O b r a z l o ž e n j e

Kantonalno tužilaštvo ZE-DO kantona Zenica optužnicom T04 0 KT 0046835 22 od 24.01.2024. godine, optužilo je K. N. zv. "K." i D. M. zv. "M." zbog krivičnog djela "krađa" iz člana 286. stav 1. u vezi sa članom 31. Krivičnog zakona Federacije Bosne i Hercegovine (u daljem tekstu KZ FBiH), počinjenog na način, vrijeme i mjesto kako je to pobliže opisano u optužnici, temeljeći optužbu na dokazima koji su prikupljeni u istrazi i predloženi u optužbi.

Sudija za prethodno saslušanje ovog suda potvrdio je navedenu optužnicu dana 30.01.2023. godine i zakazao ročište radi izjašnjenja o krivnji.

Na ročištu za izjašnjenje o krivnji optuženi, nakon što su u smislu odredaba člana 13. ZKP-a poučeni o svojim pravima, D. M. izjavio je da poriče krivnju, a K. N. izjavio je da je izvršio radnje na način i vrijeme kako je to opisano u dispozitivu ove optužnice, da je izvršio predmetno krivično djelo i da priznaje krivnju, zbog čega je i izvršeno razdvajanje spisa na način da je u odnosu na optuženog K. N. postupak nastavljen pod istim brojem a u fazi K, a za optuženog D. M. formiran novi spis broj 39 0 K 073661 24 K.

U odnosu na optuženog D. M. nastavljen je postupak pod brojem 39 0 K 073661 24 K i zakazan glavni pretres.

Tokom glavnog pretresa održanog dana 22.09.2025. godine optuženi je izjavio da su tačni navodi u optužnici, da je počinio ovo krivično djelo na način, vrijeme i mjesto kako je to opisano u optužnici, da priznaje krivnju po ovoj optužnici, te ističe da ne osporava vrijednost ukradenih stvari, s tim da se ne sjeća šta je kasnije bilo ukradenim predmetima.

Priznanje optuženog D. M. je potpuno i u skladu sa dokazima u spisu i to: Zapisnik o uviđaju PS Usora broj: 08-02-11/3-03-10-6-19/21 od 06.08.2021.godine; Fotodokumentaciju „Žabljak-Usora“ PS Usora broj: 19/21 od 06.08.2021. godine; Zapisnik o ispitivanju osumnjičenog D. M. PS Usora broj: 08-02-11/3-03-2-6-109/21 od 21.12.2021. godine; Zapisnik o saslušanju svjedoka-oštećenog Č. M. PS Usora broj: 08-02-11/3-03-2-6-58/21 od 12.08.2021. godine; Zapisnik o saslušanju svjedoka J. M. PS Usora broj: 08-02-11/3-03-2-6-87/21 od 26.10.2021. godine i Izvod iz kaznene evidencije za osumnjičenog D. M. PS Usora broj: 08-02-11/3-03-2-1073/22 od 28.10.2022. godine.

Pošto je optuženi tokom glavnog pretresa izjavio da priznaje krivnju, da je svjestan svih posljedica i obaveza koje proističu iz priznanja krivnje, a u spisu postoji dovoljno dokaza o krivnji optuženog, to je sud i prihvatio priznanje optuženog.

Iz provedenih dokaza i priznanja krivnje optuženog sa sigurnošću je utvrđeno da je optuženi D. M. počinio radnje opisane u izreci ove presude, odnosno da je optuženi zajedno sa K. N. noću 05/06.08.2021. godine u mjestu Ž. s ciljem pribavljanja protivpravne imovinske koristi kao i činjenice da takvim postupanjem oduzimaju tuđu pokretninu i da drugome nanose štetu, a što su i htjeli, došli do objekta pilane „Čelo Prom“ d.o.o. vlasništvo Č. M., koja pilana se nalazi u industrijskoj zoni, iz iste otuđili električni aparat za varanje ručne izrade plave boje i dvije električne brusilice i na taj način sebi pribavili protivpravnu imovinsku korist u iznosu od 1.000,00 KM, a za isti iznos oštetili vlasnika navedenih predmeta.

U ovakvim radnjama optuženog stiču se sva bitna obilježja krivičnog djela krađe iz člana 286. stav 1. u vezi sa članom 31. KZ FBiH. Optuženi je svjestan svog djela i htio njegovo izvršenje, a ne postoje okolnosti koje isključuju odgovornost optuženog, pa je sud optuženog oglasio krivim i osudio kao u dispozitivu ove presude.

Prilikom odlučivanja o vrsti i visini krivično pravne sankcije, sud je cjenio na strani optuženog sve okolnosti koje su od značaja za odmjeravanje kazne. Od olakšavajućih okolnosti sud je našao da optuženi priznaje izvršenje djela koja mu se stavljaju na teret, da je mlad, nezaposlen, da pokazuje iskreno kajanje, da je protekao duži vremenski period od izvršenja krivičnog djela, a od otežavajućih okolnosti sud je našao da je optuženi osuđivan do sada više puta za istu vrstu krivičnog djela, da se trenutno nalazi na izdržavanju kazne zatvora, pa kako je optuženi osuđivan do sada i uvjetnom osudom i kaznom zatvora, to je optuženog osudio na kaznu zatvora u trajanju od jednog mjeseca i 15 dana, smatrajući da je ova bezuvjetna kazna zatvora adekvatna težini krivičnog djela, kao i ličnosti učinioca, i da će se sa izrečenom kaznom u potpunosti postići svrha kažnjavanja iz člana 7. KZ FBiH.

Prema odredbama člana 202. stav 4. Zakona o krivičnom postupku Federacije Bosne i Hercegovine sud je optuženog oslobodio od plaćanja krivičnog postupka jer je isti nezaposlen i nalazi se na izdržavanju kazne zatvora.

U smislu odredaba člana 212. stav 3. ZKP-a FBiH sud je optuženog obavezao da oštećenom Ć. M. isplati 1/2 pričinjene štete ovim krivičnim djelom, jer je ovo krivično djelo pričinio kao saizvršilac zajedno sa K. N., a u roku od 60 dana od dana pravosnažnosti presude.

Na osnovu svega navedenog odlučeno je kao u dispozitivu ove presude.

PRAVNA POUKA:

Protiv ove presude dozvoljena je žalba
Kantonálnom sudu u Zenici u roku
od 15 dana od dana prijema presude.

SUDIJA

Bekrić Hidajeta